

禹  
貢  
指  
南



禹  
貢  
指

南

毛  
晃  
撰

中  
華  
書  
局

叢書集成初編

禹貢指南

中華書局 出版發行

(北京王府井大街三十六號)

秦皇島市資料印刷廠印刷

一九八五年北京新一版

開本：七八七乘一〇九二毫米三十二分之一

統一書號：一七〇一八·一五一

禹貢指南

此據聚珍版叢書  
本排印初編各叢  
書僅有此本



## 禹貢指南提要

明焦竑經籍志載禹貢指南一卷。宋毛晃撰。宋史藝文志無之。朱彝尊經義考亦云未見。又云文淵閣書目有之。不著撰人。疑卽晃作。晃宋史無傳。世所傳增註禮部韻略。于紹興三十二年表進。自署衢州免解進士者。卽其人也。是書引爾雅、周禮、漢志、水經注、九域志諸書。而旁引他說。以證古今山水之原委。頗爲簡明。雖生于南渡偏安之後。僻處一隅。無由睹中原西北之古蹟。一一親核其真。而援據考證。獨不泥諸儒附會之說。故後來朱子書說及蔡氏集傳多用之。亦言地理者所當考也。世無傳本。其體例之舊不可見。永樂大典所載與諸家註解散附經文各句下。今綴錄成編。釐爲四卷。依經文次第標列。其無註者。則經文從略焉。

# 禹貢指南卷一

宋 毛 晃 撰

冀州。

爾雅兩河間曰冀州。郭璞注曰：自東河至西河。李巡注曰：兩河間其氣清，厥性相近，故曰冀。冀，近也。周禮職方氏：河內曰冀州，謂其在三河之內，蓋東河之西，西河之東，南河之北也。案禹貢導河積石，自積石而下南流，謂之西河。至于華陰，折而東，經底柱山，又東逕孟津，東過洛水之北，皆東流，謂之南河。至于大伾山，折而北流，過降水，至于大陸，又北播爲九河，同爲逆河，入于海，謂之東河。爾雅言兩河間者，舉其二，則三可知也。晉地理志：春秋元命苞云：昂畢散爲冀州，亂則冀安，弱則冀強，荒則冀豐。孔安國曰：舜分冀州之域爲幽州、并州。孔穎達曰：據職方氏，幽、并山川皆冀州之域，故安國知之。杜牧罪言：禹畫九土，一曰冀州。程其水土，與河南等，常重十一二，以其特強不循理，冀其必破弱，雖已破，冀其復強大，因以爲名。

旣載壺口。

九域志：河東隆德府潞州，上黨郡，上黨縣，壺口山，在上黨東，太行山，在上黨南。漢地理志：在河東郡北，屈縣東南，今隰州吉鄉縣也。

治梁及岐。

梁山。在左馮翊、夏陽縣西北。水經：河水南逕梁山原東。酈道元注：自原山東南至河，晉之望也。殷梁傳：成公五年，梁山崩，遏河水三日不流。晉侯以問伯宗，卽是處也。九域志：今永興縣卽同州馮翊郡。定國軍有梁山，山在龍門之南。

岐山。水經：在右扶風美陽縣西北。梁岐二山在雍州。今于冀州言之者，豈當時河患上及梁岐乎？禹導底柱，則壺口平，而梁岐自治。因河而言，非以二山爲冀州之地也。

旣修太原，至于岳陽。

太原，晉陽也。今并州之地。高平曰原。此又原之大者。太岳，導山序。壺口雷首。至于太岳。水經：太嶽山在河東永安縣南。職方氏：冀州山鎮曰霍山。案霍山有二：在冀州者，又謂之太岳。在荊州者，又謂之天柱山。潞水出焉。漢地理志作岳陽。注：在太原西南。

覃懷底績，至于衡漳。

覃懷。九域志：今河北西路懷州河內郡卽其地。濁漳水，一名降水。導河序：北過降水，至于大陸，是也。顏師古注：漢地理志：衡漳，謂漳水橫流而入河也。水經：清漳水出上黨沾縣西北，少山大眎谷南，過縣西，又從縣南，屈東過涉縣西，屈從縣南，東至武安縣南，黍窖邑，入于濁漳。酈注：淮南子曰：清漳出揭戾山。高誘云：在沾縣。漢分沾縣爲樂平郡治。沾縣，晉太康地。記曰：樂平縣，舊名清漳。涉縣，魏郡之

屬縣也。九域志河北東路冀州信都郡定武軍有昌亭城。水經云漳水東北至昌亭。今漳沱衡漳水。今長蘆河。則其故瀆也。

厥賦惟上上錯。厥田惟中中。

諸州雜賦。冀上上錯。揚下上上錯。豫錯上中。梁下中三錯。

諸州田賦。雍田上上。徐田上中。青田上下。豫田中上。冀田中中。兗田中下。梁田下上。荆田下中。揚田下下。冀賦上上。豫賦雜出亦上上。冀賦雜出上中。豫賦亦上中。荆賦上下。青賦中上。徐賦中中。兗雍之賦中下。揚賦雜出亦中下。揚賦下上。梁賦雜出亦下上。梁賦下中。梁賦雜出又下下。雍青徐以上地出中賦。冀以中地出上賦。

恆衛既從。大陸既作。

恆水。出常山上曲陽。東入澠水。水經澠水出代郡靈邱縣高氏山。南過廣昌縣南。又東南過中山

上曲陽縣北。恆水從西來注之。注澠水。兼納恆川之通稱。

衛水。出常山靈壽縣。東北入漳沱河。

大陸。在鉅鹿縣北。爾雅晉有大陸。注今鉅鹿北廣河澤是也。大陸之野。一名朝歌。商紂之所都也。水經注引應劭曰。麓者林之大也。尚書曰。堯將禪舜。納之大麓之野。烈風雷雨不迷。致之以昭華之玉。而縣取目焉。秦始皇二十年滅趙。以爲鉅鹿郡。漢景帝中元元年。爲廣平郡。武帝征和三年。爲廣平侯。



國光武中興更爲鉅鹿今屬邢州汲郡脩武縣亦有大陸。

島夷皮服。

島夷。漢地理志作烏夷。顏師古曰東北夷搏取禽獸食其肉衣其皮也。一說居海島被服容止皆象鳥作鳥謂居海島也。

夾右碣石入于河。

碣石山。在海畔右北平驪城縣西南。河自碣石山南渤海之北入海。夾右。夾音挾。自海入河逆流而西。右顧碣石如在挾掖也。水經。碣石山在遼西臨渝縣南水中。注。大禹鑿其石。右夾而納河。秦始皇漢武帝皆嘗登之。海水西侵。歲月逾甚。而苞其山。故言水中也。水經。河水東北過甲下邑。濟水從西來注之。又東北入于海。又東分爲二水。枝津東逕甲下城南。東南歷常沈注濟。注。經言濟水注河。自枝津東北流逕甲下邑。東北流入于海。淮南子曰。河九折注爲海。而流不絕者。崑崙之輸也。禹貢曰。夾右碣石入于河。山海經曰。碣石之山。繩水出焉。東流注于河。河之入海。舊在碣石。今川流所導。非禹瀆也。周定王五年。河徙故瀆。故班固曰。商竭周移也。顏師古曰。言禹夾行此山之右。而入于河逆上也。孔傳同。凡九州末言。由諸水入河者。皆通舟楫漕運。以達京師也。

濟河惟兗州。

東南據濟。西北距河。河濟之間。相去不遠。兗州之界。止于濟也。爾雅。濟河間曰兗州。注。自河東至濟。

周禮職方氏河東曰兗州。武王封周公子伯禽于曲阜爲魯侯。秦爲薛郡。後魏置南兗州于譙城。置西兗州于定陶城。隋改爲魯州。唐武德初平徐圓朗復爲兗州。晉地理志兗州濟河地舜置十二牧則其一也。春秋元命苞云五星流爲兗州。兗端也。信也。又曰蓋取兗水以爲名焉。

九河既道

徒駭。郭璞曰今在成平縣。義未聞。

太史。郭璞曰今所在未詳。

馬頰。郭璞曰河勢上廣下狹狀如馬頰。案原本缺太史馬頰二河今補入

覆釜。郭璞曰水中可居住。往往而有狀。案今本爾雅注作水中可居住而有狀如覆釜。

胡蘇。郭璞曰東莞縣今有胡蘇亭。其義未詳。

簡。郭璞曰水道簡易。

絜。郭璞曰水多約絜。

鉤盤。郭璞曰水曲如鉤流盤桓也。

鬲津。郭璞曰水多阨狹可隔以爲津而橫渡。

爾雅九河皆禹所名。正義曰河自大陸以北數爲九河。謂大陸在冀州。嫌九河亦在冀州。故云在此州界也。河從大陸東畔北行而東北入海。冀州之東境。至河之西畔。水分大河東爲九道。故知在兗州。

界平原以北是也。李巡曰：徒駭，禹疏九河，以徒衆起，故云徒駭。太史：禹大使徒衆通其水道，故云太史。馬頰，河勢上廣下狹，狀如馬頰也。覆鬴，水中多渚，往往而處，形如覆鬴。胡蘇，其水下流，故曰胡蘇。胡下也。蘇，流也。簡，大也。河水深而大也。絜，言河水多山石，治之苦絜絜，苦也。鈎盤，言河水曲如鈎，屈折如盤也。鬲津，河水狹小，可鬲以爲津也。孫炎曰：徒駭，禹疏九河，用功雖廣，衆懼不成，故曰徒駭。胡蘇，水流多散，胡蘇然，其餘同。李巡：導河篇云：濟水故渠，今在冀州西界。大陸，今在德州德平縣。經滄州清池縣西北。太史：今在德州安德縣東南。經滄州臨津縣西。馬頰，在德州北平縣。經安德縣西南。恩州漳南縣東。棗州商河縣北。覆鬴，今在永靜軍阜城縣東。經東光縣西北。胡蘇，今在滄州南皮縣東。光縣北。經滄州無棣縣西北。絜，今在滄州南皮縣。經滄州臨津縣。鈎盤，今在德州德平縣西。經滄州樂陵縣東。棗州陽信縣北。滄州樂陵縣西南。鬲津，在德州平原縣東。經滄州臨津縣東。樂陵縣西。饒安無棣縣南。並在德州平原以北。惟簡河亡焉。同爲逆河入于海。今大名府石奔故瀆在焉。

雷夏既澤

雷夏澤 在濟陰成陽西北。水經注云：雷澤西南十許里有小山，山北有小阜，南屬池澤之東北，有陶墟。郭緣生言：舜陶所在墟阜，聯屬濱帶瓠河也。一云：舜所漁處，本名夏澤。

灘沮會同

灘水 灘於用切。爾雅：水自河出爲灘。又云：河有灘。又云：灘反入。郭注：河水決出復還入者，河之有灘。

猶江之有沱。漢地理志作雍沮。沮水出常山元氏縣入河。雍水不言出入。

沮水。沮七餘切。案沮水與雍州沮水不同。荊州沮水在房陵。左傳所謂江漢沮漳。楚之望也。導川云。

漆沮既從。即雍州之沮也。今此沮水。自會同于雷夏之間。非雍州之沮也。水經不著所出。或云沮水出

北地直路縣入洛。洛非河南洛水也。

厥土黑墳。

土黑墳。墳扶粉切。土脈墳起也。

厥田惟中下。厥賦貞。

田中下第六。

賦貞。賦與田相當。

厥篚織文。

篚織文。漢地理志。篚字作斐。顏師古曰。斐與篚同。竹器。篚屬。織文。錦綺之類。冀州不言貢篚。貢者。

下以職供之謂也。冀州帝都所在。無所效其臣職故也。

浮于濟。深達于河。

濟水。沈水東流為濟。爾雅。濟為澹澹。音楚。濟水出河東垣縣王屋山。東南至河內武德縣入河。並

流而南。截河又並流溢出。乃為滎澤也。水經。濟水出河東垣縣東王屋山為沈水。又東至溫縣西北

爲濟水。又南當鞏縣北，南入于河，與河合流而東過滎陽縣北。漢地理志：濟作洙州，末言浮于濟，潔達于河。顏師古曰：浮，以舟渡也。達，通也。因水入水曰通。又解在導川沈水，濟水下。

潔水。出東郡東武陽縣，至樂安千乘縣入海。水經：潔水東出于高唐縣大河，右迤東注潔水，酈道元注曰：桑欽地理志曰：潔水出高唐。余案竹書穆天子傳：程丁卯天子自五鹿東征，釣于潔水，是曰祭丘，己巳東征，食馬于潔水之上，尋其沿歷，逕趣不得近高唐也。桑氏所言，蓋津流出次于其間也。地理風俗記曰：潔水東北至千乘入海，河盛則通津委海，水耗則微消絕流。

海岱惟青州。

東北據海，西南距岱。

青州。東北跨海及遼東，舜分青爲營州，卽遼東也。漢末公孫度據遼東，自號青州刺史。爾雅：齊曰營州。郭注：自岱東至海，此蓋商制無青州，并青于徐。周制有青無徐，并徐于青，故職方氏正東曰青州。其山鎮曰沂山，其澤數曰望諸，其川淮泗，其浸沂沐。晉地理志：青州蓋取土居少陽，其色爲青，故以名也。春秋元命苞云：虛危流爲青州。

嵎夷既略。

嵎夷。堯命羲仲所宅處，以其在東，日所出，故曰暘谷。

濰淄其道。

濰水。出琅邪箕屋山。北至都昌縣入海。水經。濰水出琅邪箕縣。東北過武城縣西。又北過平昌縣。東。又北過高密縣西。又北過淳于縣東。又東北逕都昌縣東。又東北入于海。注云。濰水導源濰山。許叔重呂忱云。濰水出箕屋山。淮南子曰。濰水出覆舟山。蓋廣異名也。

淄水。出泰山萊蕪縣原山。東北至于乘博昌縣入海。水經。淄水與汶水。同出泰山萊蕪縣原山。東北。又東北過臨淄縣東。又東過利縣東。又東北入于海。漢地理志。濰淄。作惟留。顏師古曰。濰淄。惟留。古今通用。道讀曰導。導治也。一說水復故道。音上聲。一音導。謂導道而流也。

海濱廣斥。

斥。鹵地也。漢志。海濱。作海瀕。廣斥。作廣湯。注。瀕。音頻。又音濱。湯。音昔。

厥田惟上下。厥賦中上。厥貢鹽絺。海物惟錯。岱畎絲枲。鉛松怪石。萊夷作牧。厥篚檠絲。

田上下第三。

賦中上第四。

貢鹽。絺。海物。絲。枲。鉛。松。怪石。篚。檠絲。顏府古曰。檠。桑也。食檠之蠶絲。可以絃琴瑟。或曰。檠。山柘也。蠶

食柘葉者。絲黃而韌。可以爲絃。

萊夷。春秋。夾谷之會。萊人以兵劫魯定公。孔子曰。兩君合好。而夷裔之俘。以兵亂之。是知古者東萊之有夷也。夾音劫。應劭十三州記曰。泰山萊蕪縣。魯之萊柞邑也。左傳與之無山。及萊柞。案左傳本作辭以無



山與之。是也。齊靈公滅萊。萊民稍流此谷。邑落荒蕪。故曰萊蕪。漢高祖置縣。萊山之夷。周曰萊子國。漢曰東萊。

浮于汶。達于濟。

汶水。爾雅。汶爲瀾。音闡。水經。汶水出泰山萊蕪縣原山。西南過羸縣南。又東南過奉高縣北。屈從縣西南流。過博縣西北。又西南過蛇邱縣南。又西南過岡縣北。又西南過平章縣南。又西南過無鹽縣南。又西南過壽張縣北。又西南至安民亭。入于濟。注。萊蕪縣在齊城西南原山。又在縣西南六十里。許地理志。汶水與淄水俱出原山。西南入泂。故不得過其縣南也。從征記曰。汶水出縣西南流。淮南子。汶水出朱虛弗其山。乃東汶水。非此也。諸州之末。皆記入河水道。以堯都在冀。而河行于冀也。青州雖不言河。而曰達于濟。則因濟達河也。地理志。州末言浮于汶。達于泂。顏師古曰。言渡汶水西達于泂也。青州不言河。由堯而見也。兗州之末。言浮于濟。潔達于河。謂渡濟潔而通河也。青州次兗。故言達于濟。達通也。因水入水曰通。渡汶通濟。則渡濟可以通河矣。

海岱及淮惟徐州。

徐州。爾雅。濟東曰徐州。注云。自濟東至海。李巡注曰。淮海間。其氣寬舒。稟性安徐。故曰徐。徐舒也。周禮職方氏。無徐州。正義曰。以徐州合之于青州。青州分爲幽并。晉地理志。徐州于周入青州之域。春秋元命苞云。天氏流爲徐州。蓋取舒緩之義。或云。因徐邱以立名。

淮沂其乂。

淮水。出桐柏山。其源遠矣。于此言之者。淮水至此而大。為害尤甚。喜其治。故于此紀之。淮水出胎

簪山。東北過桐柏。胎簪。蓋桐柏之旁小山也。水經。淮水東至廣陵。淮浦縣入于海。顏師古注。漢地

理志。淮水出大復山。九域志。壽春府有淮濱。胎簪山。在南陽平氏縣。

沂水。水經注。沂水出尼邱山。西北經魯之零門。曾點浴乎沂者。非禹貢沂水也。

蒙羽其藝。

蒙山。水經注云。禹貢有兩蒙山。在徐州者。在泰山蒙陰縣西南。在梁州者。在蜀郡青衣縣。今日蒙頂。

羽山。水經注。在東海祝其縣南。山西有羽淵。禹父之所化。其神為黃龍。入于羽淵。山海經曰。洪水

滔天。鯀竊帝之息壤。以堙洪水。不待帝命。帝令祝融殺鯀于羽郊。漢地理志。藝作藪。

大野既豬。爾雅。魯有大野。郭璞注。今高平鉅野縣東北。大澤是也。鉅野縣。今屬濟州。漢地理志作大埜。春

秋左氏傳。哀公十四年春。西狩于大野。叔孫氏之車子鉏商獲麟。杜預曰。大野。在東平鉅野縣東北。大

澤是也。周禮職方氏。大野屬兗州澤藪。

東原底平。

東原。今東平郡鄆州。在魯之西。獲麟之地。

羽賦夏翟。嶧陽孤桐。泗濱浮磬。淮夷蠙珠暨魚。厥篚玄纁縞。

漢地理志。夏翟作夏狄。泗濱作泗瀕。暨魚作泉魚。篚元纁縞。言獻黑細繒及鮮支也。或謂纁言質之細而元之與縞其色也。以纁該于元縞之中。則色雖不同。皆纁質也。此乃古史立言之法。猶雲土夢然耳。禮記注云。元與縞謂之纁。一曰白經黑緯曰纁。詩注亦作紵。

浮于淮泗。達于河。

漢地理志。州未言浮于淮泗入于河。顏師古曰。渡二水而入于河。

汴河。右自淮泗入河。必道于汴。世謂隋煬帝始通汴入泗。禹時無此水道。以疑禹貢之言。此特學者考之不詳而已。案前漢書項羽與漢約中分天下。割鴻溝以西爲漢。以東爲楚。文穎注云。于滎陽下。引河東南爲鴻溝。以通宋。鄭、陳、蔡、曹、衛與濟、汝、淮、泗會于楚。卽今官渡水也。魏曹操與袁紹相持于官渡。乃楚漢分裂之處。蓋自秦漢以來有此。安知非禹迹也。禹貢九州之末。皆記入河水道。而淮泗獨不能入河。帝都所在。理不應爾。意其必開此道以通之。其後或爲鴻溝。或爲官渡。或爲汴。上下百餘里間。不可必然。皆引河水而注之。淮泗也。故王濬伐吳。杜預與之書曰。足下旣摧其西藩。當徑取秣陵。討累世之逋寇。釋吳人于塗炭。自江入淮。逾于四汴。沂河而上。振旅還都。亦曠世一事也。王濬舟師之盛。古今絕倫。而自汴水沂河。可以班師。則汴水之大小。當不減于今。又足以見秦、漢、魏、晉皆有此水道。非煬帝創開也。自唐以前。汴泗會于彭城之東北。然後東南入淮。近歲汴水直達于淮。不復入泗矣。吳王夫差。